

Акафист святым мученикам Гурию, Самону и Авиву

Празднование 28 (15) ноября

Кондак 1

Избранныи чудотворцы Христовы и святые веры исповедницы, Гурие, Самоне и Авиве добронравнии, память вашу чтуци песньми похвальными, воспеваем яко христиан заступников, страждущих покровителей. Вы же, имуще дерзновение ко Господу, от всяких бед и напастей свободите нас, верою и любовью зовущих:

Радуйтесь, Гурие, Самоне и Авиве, страстотерпцы Христовы и обидимых покровителие.

Икос 1

Ангелы во плоти, Троице Святей равночисленнии, любовь к Богу горяще идолы попрасте, веру Христову укрепите, Троицу Святую прославите, темже убо похваляюще подвиги ваша, глаголем вам сице:

Радуйтесь, светильники благочестия; радуйтесь, обличители нечестия. Радуйтесь, утверждения веры Христовой; радуйтесь, столпы Церкви Божия. Радуйтесь, верных надеждо и заступление; радуйтесь, неверных страх и посрамление.

Радуйтесь, Гурие, Самоне и Авиве, страстотерпцы Христовы и обидимых покровителие.

Кондак 2

Видя нечестие людей града Едеса, святии Гурий и

Самон в пустыню удалишися, бегая князя мира сего и соблазнов и усердно служаще Богу, день и ночь воспеваху: Аллилуия.

Икос 2

Разум премудр имея, святии мученицы, выну трудишася во славу Божию, языческое нечестие обличая, ищущия истины на путь правый наставляя и мнози неверныя к Богу истинному привлекоша, сего ради глаголем вам сице:

Радуйтесь, насадителие истиннаго богопочитания; радуйтесь, искоренителие демонскаго служения. Радуйтесь, тьмы нечестия обличителие; радуйтесь, идольския прелести низложителие. Радуйтесь, исповедницы Христовы изряднии; радуйтесь, светила веры православней.

Радуйтесь, Гурие, Самоне и Авиве, страстотерпцы Христовы и обидимых покровителие.

Кондак 3

Силою свыше осененнии святии мученицы, гонителей святой веры неустрашишася, веления нечестиваго Антониана небрегоша и веру Христову велегласно прославиша, темже и в темницу ввержени пояху Богу: Аллилуия.

Икос 3

Имея веру во Христа адаманта твердейшую и силою тоя вооружившиися, мужественно претерпели есте, святии мученицы, темничныя узы и самую смерть, сего ради похваляюще таковое мужество, ублажаем вас сице:

Радуйтесь, истинныя веры исповедницы; радуйтесь, Царствия Божия наследницы. Радуйтесь, мучеников похвало; радуйтесь, страстотерпцев славо. Радуйтесь, святыя Церкви утверждение; радуйтесь, всего рода христианскаго украшения.

Радуйтесь, Гурие, Самоне и Авиве, страстотерпцы Христовы и обидимых покровителие.

Кондак 4

Бурею помышлений сумнительных одержимый, нечестивый царь Ликийский воздвиже жестокое гонение на христианы, ты же, страстотерпче Авиве, того не убоясь, с твердою верою взывал еси Христу Богу: Аллилуия.

Икос 4

Слышав царь Ликийский твои подвиги, досточудный Авиве, и твое твердое веры исповедание, разъярися на тя злобою, повеле предати тя смерти лютей яко противника царева, ты же, уведев о сем, добровольно потекл еси на мучение, и с радостию претерпел еси огненное сожжение, сего ради дивящися великому мужеству твоему, величаем тя сице:

Радуйся, поборниче веры во Христа неустрашимый; радуйся, воине Христов непобедимый. Радуйся, повешанный на древе за Распростершаго руце Свои на древе крестнем; радуйся, строганный когтыми железными. Радуйся, утешение подаваяй скорбящим; радуйся, скорый помощниче всем за истину терпящим.

Радуйтесь, Гурие, Самоне и Авиве, страстотерпцы Христовы и обидимых покровителие.

Кондак 5

Боготечным звездам на тверди небесней подобнии были есте, святии мученицы, лучами жития своего тьму языческаго нечестия просвещающи и многих на путь истинны наставляющи. Темже благоговейно чтуще память вашу, благодарно поем Богу: Аллилуия.

Икос 5

Видеша людие града Едеса многие чудеса, бываемыя от раки святых мучеников Гурия, Самона и Авива, зело радовахуся и Господа всем сердцем прославляху, мы же чтуще святую память вашу, святии мученицы, умильно взываем:

Радуйтесь, неправедно гонимых заступницы; радуйтесь, верных рабов Христовых друзи. Радуйтесь, сущих во узах и темницах хранителие; радуйтесь, гонителей и обидящих вразумителие. Радуйтесь, плачущих утешителие; радуйтесь, от наглыя и лютыя смерти избавителие.

Радуйтесь, Гурие, Самоне и Авиве, страстотерпцы Христовы и обидимых покровителие.

Кондак 6

С высоты мудрии благодать приемше, за сущих во искушении предстоите, всехвальнии, темже отроковицу, святии, от смерти горькия избависте. Вы бо воистинну есте граду Едесу слава и миру радость, сего ради воспеваем ко Господу: Аллилуия

Икос 6

Вражия работы избави нас, Иисусе Жизнодавче,

Твоих страдалец мольбами умоляем, яко да не порабощенну стяжав от страстей душу и тело, восхваляем тех скорейшую помощь, якоже во гробе затворенную мужем и сию скоро предваривше от смерти избавиша, темже взываем вам сице:

Радуйтесь, невинную жену от лютыя смерти спасшии; радуйтесь, дивным спасением ея зверства мучителя победившии. Радуйтесь, злаго мужа жестокое деяние обличившии; радуйтесь, и того веровати в силу Бога христианскаго научившии. Радуйтесь, подателие милости тоя требующим; радуйтесь, стражи неусыпнии почитающих память вашу.

Радуйтесь, Гурие, Самоне и Авиве, страсотерпцы Христовы и обидимых покровителие.

Кондак 7

Хотяй Человеколюбец Господь явити милость Свою людям Своим, сохрани телеса ваши нетленны, чудеса точащии, от них же вси вернии токи исцелений получают, зовуще Богу: Аллилуия.

Икос 7

Новых заступников и дивных чудотворцев ведуще, людие из града Едеса святой храм в память вашу создаша, в нем же и мощи ваша положиша, да вси страждущии помощь в них почерпают, мы же такожде тверду надежду на вас имуще, взываем вам сице:

Радуйтесь, душевных и телесных недугов наших целителие; радуйтесь, бесов о имени Господни изгонителие. Радуйтесь, Евангельския истины

благодати благовестителие; радуйтесь, Божественныя благодати носителие. Радуйтесь, скорби многи за имя Господне приявшии; радуйтесь, дивно во святых Его просиявшии.

Радуйтесь, Гурие, Самоне и Авиве, страстотерпцы Христовы и обидимых покровителие.

Кондак 8

Странно и страшно неверным слышати, каковы дивные дела от святых мощей ваших совершаются: недужи врачуются, страсти исцеляются, мы же, твердо надежду на нас имуще, Богу о вас тако благодеющему с верою взываем: Аллилуия.

Икос 8

Всеми добродетельми исполненнии, за нихже и славою Божиею почтении, внимайте, святии мученицы, молитвам верных, чтущих святую память вашу, от нихже слышите сицевая:

Радуйтесь, нищии духом, яко ваше есть Царствие Небесное; радуйтесь, плачущии, яко утешистесь. Радуйтесь, кротции, яко наследовасте землю; радуйтесь, алкавшии и жаждавшии правды, яко насытишася. Радуйтесь, милостивии, яко стяжали есте помилование; радуйтесь, чистии сердцем, яко уже Бога узресте.

Радуйтесь, Гурие, Самоне и Авиве, страстотерпцы Христовы и обидимых покровителие.

Кондак 9

Всякия напасти, находящия на град Едес, разоряли есте, святии мученицы, темже и ныне не оставите нас

смиренных и грешных, но вся люди страны нашея в Православии и единомыслии утвердите, да вси едиными усты и единым сердцем воскликнем прославившему вас Господу: Аллилуия.

Икос 9

Ветии многовещаннии, яко рыбы безгласнии зрим о вас, святии мученицы; недоумеют бо, како в пустыни духом витали есте и посреде человек неусыпными подвиги подвизастесь. Мы же радуящися, яко таковы имамамы учители и молитвенники, прославляем вас, глаголюще:

Радуйтесе, кимвалы Слова Божия; радуйтесе, теплии о нас пред Богом ходатаи. Радуйтесе, иудеев и еллинов просветителие; радуйтесе, тридневнаго Божества благовестителие. Радуйтесе, кротости и воздержания учителие; радуйтесе, лжи и татьбы обличителие.

Радуйтесе, Гурие, Самоне и Авиве, страсотерпцы Христовы и обидимых покровителие.

Кондак 10

Спасти хотя люди града Едеса от мысленнаго волка, твердо увещали есте тех стояти во истинней вере, ниже козней вражиих устрашатися, но и в скорбех и напастех за вас благодарити Бога, поюще Ему: Аллилуия.

Икос 10

Стена тверда и надежнее прибежище есте, святии мученицы, всем к вам прибегающим и скорыя помощи требующим, сего ради во умилении сердца

нашего взываем:

Радуйтесь, всех скорбящих радование; радуйтесь, всех угнетенных и поработенных прибежище и освобождение. Радуйтесь, вдов и сирот заступление; радуйтесь, от ересей и расколов ограждение. Радуйтесь, яко вси нечестивии житию вашему удивляются; радуйтесь, яко вси благочестивии о имени вашем веселятся.

Радуйтесь, Гурие, Самоне и Авиве, страстотерпцы Христовы и обидимых покровителие.

Кондак 11

Пение благодарственное приносяще ко Господу и о нас, теплии заступницы наши, молим вас присно не отступить от нас, грех наших ради, но милосердие от Господа всем испросите, вопиющим Ему: Аллилуия.

Икос 11

Светозарную троицу святых мучеников восхваляюще, вернии, устранимся распрей и раздоров в жизни сей, убежим несогласий и разделений в православней вере и храняще единение духа в союзе мира, из глубины души воскликнем тако:

Радуйтесь, громогласныя трубы евангельскаго благовестия; радуйтесь, сладкозвучныя гусли проповеди спасения. Радуйтесь, крепции правды рачителие; радуйтесь, непоколебимии неправды истребителие. Радуйтесь, благочестивым семействам мира и блага подателие; радуйтесь, жестоким и неверным супругом строгие наказателие.

Радуйтесь, Гурие, Самоне и Авиве, страстотерпцы

Христовы и обидимых покровителие.

Кондак 12

Благодать, данную вам от Бога, ведуще, память вашу празднуем, святые мученицы, с усердным молением к вашему честному образу притекающе, вашею твердою помощию, яко неборимую стеною ограждаем, сего ради восхваляем вас, страстотерпцы Христовы, и усердно зовем Богу: Аллилуия.

Икос 12

Поюще ваше дивное житие и мученическую кончину, молим вас, страстотерпцы Христовы Гурие, Самоне и Авиве, будете нам во всем благие помощницы, благословите нас миром и любовью, подайте нам твердую веру, чистоту жизни и страх Божий, да вси душевный покой имуще, в радости воскликнем:

Радуйтесь, яко имена ваша и между неверными прославляются; радуйтесь, покой и отрадо скорбящим. Радуйтесь, страх и удивление обидящим; радуйтесь, невинную жену от лютыя смерти спасшии. Радуйтесь, злаго мужа ея достойно покаравшии.

Радуйтесь, Гурие, Самоне и Авиве, страстотерпцы Христовы и обидимых покровителие.

Кондак 13

О святии страстотерпцы Христовы Гурие, Самоне и Авиве, примите сие наше хвалебное пение и, услышав усердно желание наше, избавите нас теплым своим к Богу предстательством, от всякаго

зла, от вражды и несогласий и всяких лютых бед и болезней, да с любовью вас чтуще, выну зовем Богу: Аллилуия, Аллилуия, Аллилуия.

(Этот кондак читается трижды, затем икос 1 и кондак 1)

Икос 1

Ангелы во плоти, Троице Святей равночисленнии, любовь к Богу горяще идолы попрасте, веру Христову укрепите, Троицу Святую прославите, темже убо похваляюще подвиги ваша, глаголем вам сице:

Радуйтесь, светильники благочестия; радуйтесь, обличители нечестия. Радуйтесь, утверждения веры Христовой; радуйтесь, столпы Церкви Божия. Радуйтесь, верных надеждо и заступление; радуйтесь, неверных страх и посрамление.

Радуйтесь, Гурие, Самоне и Авиве, страстотерпцы Христовы и обидимых покровителие.

Кондак 1

Избранныи чудотворцы Христовы и святые веры исповедницы, Гурие, Самоне и Авиве добронравнии, память вашу чтущи песньми похвальными, воспеваем яко христиан заступников, страждущих покровителей. Вы же, имуще дерзновение ко Господу, от всяких бед и напастей свободите нас, верою и любовью зовущих:

Радуйтесь, Гурие, Самоне и Авиве, страстотерпцы Христовы и обидимых покровителие.

Молитва

О святии мученицы и исповедницы Христовы Гурие, Самоне и Авиве! Теплии о нас ходатаи и

молитвенницы пред Богом, во умилении сердец наших, взирая на пречистый ваш образ, смиренно молим вас: услышите нас, грешных и недостойных рабов своих, сущих в бедах, скорбех и напастех, и призрев наша тяжкая и безчисленная прегрешения, явите нам свою великую милость, воздвигните нас из глубины греховныя, просветите наш ум, смягчите злое и окаянное сердце, прекратите зависть, вражду и раздоры, в нас живущие. Осените нас миром, любовью и страхом Божиим, умолите милосерднаго Господа, да покрывает множество грехов наших Своим неизреченным милосердием. Да соблюдет Церковь Свою святую от неверия, ересей и расколов. Да подаст стране нашей мир, благоденствие, земли плодородие; супругом любовь и согласие; чадом послушание; обидимым терпение; обидящим страх Божий; скорбящим благодушие; радующимся воздержание. Всех же нас да покрывает Своею всесильною десницею, и да избавит от глада, губительства, труса, потопа, огня, меча, нашествия иноплеменников и междоусобных брани, и напрасныя смерти. Да оградит нас ополчением святых Своих Ангелов, во еже избавитися нам по исходе нашем из жития сего от козней лукаваго и тайных воздушных мытарств его и не осужденными предстати Престолу Господа Славы, идеже лица святых Ангел со всеми святыми выну славят пресвятое и великолепое Имя Отца и Сына и Святаго Духа, ныне и присно и во веки веков. Аминь.